

兄餘兵得數千人自立為伊利目單于道逢郅支合戰

郅支殺之并其兵五萬餘人聞漢出兵穀助呼韓邪即

遂留居右地自度力不能定匈奴師古曰度音徒各反乃益西近

烏孫欲與并力遣使見小昆彌烏就屠烏就屠見呼韓

邪為漢所擁郅支亡虜欲攻之以稱漢師古曰稱漢朝之意也稱音尺

孕反乃殺郅支使持頭送都護在所發八千騎迎郅支郅

支見烏孫兵多其使又不反勒兵逢擊烏孫破之師古曰以

兵逆之相逢即擊故云逢擊因北擊烏揭師古曰揭音丘例反烏揭降發其兵

西破堅昆北降丁令師古曰令音零并三國數遣兵擊烏孫常

勝之堅昆東去單于庭七千里南去車師五千里郅支